

loco dil qual andò sier Piero Balbi; era vestito di scarlato e referì di quelle cosse, poi referì sier Antonio Marzelo, venuto capitano di le galie di Baruto, vestito di veludo eremexin, e laudò li patroni, disse di l'armada francese, quando la andò a Baruto, e fo tutti do laudati dal Principe, justa il solito; e il capitano predito referirà in Pregadi.

Da poi disnar, fo Consejo di X con la Zonta, e prima preseno che la materia di quelli di Crema si apresentationo per homicidio pensado per la morte di quel Cremasco, et fono asolti, che *etiam* siano expediti per il . . . , i qual si voleno apresentation a le preson.

Item, fono sopra la materia di strigoni di brexana, e leto alcuni processi vecchi e come è stà brusà più di 60, et parlò sier Lucha Trun el consier, ma longamente, ma nulla non fece, el qual voleva più non si andasse drio tal cossa, ma disputato la materia fo deliberato che lo episcopo di Caodistria, domino Alvise di Taxi, al qual fo commesso tal materia per il Legato, venisse in questa terra con li processi novi.

Noto. Sier Andrea Mudazo era di Zonta dil Consejo di X, electo, stete *solum* 8 zorni e uscite per intrar a la bancha consier sier Nicolò Bernardo, suo zerman in loco di sier Marco Minio acceptoe ducha in Candia, el qual intrò a di 11 poi disnar.

283* *A di 13.* Fo santa Lucia. La matina fo *letere di Roma, di l'orator nostro, di . . .* qual fo lete con li Cai di X, e credo sia in materia di quello ha exposto al Papa monsignor di San Marzeo e il signor Alberto da Carpi, il sumario dirò di sotto, di le publice. *Etiam* fo *letere di Napoli*.

Da poi disnar, fo Colegio di Savii per aldir il signor Alvise di Gonzaga fo fiol dil signor Redolpho che morite al Taro, al qual fo dato provision a li fioli di ducati 1000 a l'anno, e dal principio de la guerra in qua par non habbi auto nulla, e li Savii li disse si vederia di trovar qualche expediente.

A di 14. Fo leto in Colegio *letere di Cipro di sier Bartolamio da Mosto capitano, et di sier Zacaria Loredan provedador zeneral di Cipro*. In conformità scriveno del successo di l'armata francese etc. La copia de le qual *letere* over il sumario noterò di soto.

In questa matina la Signoria, avendo inteso che senza conzar altramente l'incanto de le galie di Fian-dra, venendo li Consieri a Rialto a incantar le galie trovariano patron, et però li Consieri ozi andono e trovano patron: la prima ave sier Sebastian Falier qu. sier Thomà per L. 72, la seconda sier Antonio

Donado qu. sier Bartolamio, qu. sier Antonio cavalier per L. 100, la terza sier Zuan Donado di sier Alvise per L. 130.

Da poi disnar fo Consejo di X con la Zonta, et preseno molte gratie, *videlicet* a li debitori di perdeda di dacia a le Raxon nuove di pagar come li altri in pro' d'imprestedi e cavedali di Monte vecchio in anni 20 *ut in parte*.

Item, preseno spender zercha ducati 30 in reparar la caxa di Lio dil Consejo di X, et far si possi habitar et star. *Item*, preseno che ducati 1000, dia haver per il suo maridar una fia qu. sier Alvise Michiel fo morto soracomito da turchi in Modon, li sia dati di certi danari di beni di rebelli, a le Raxon vecchie.

Di Franza, fo letere da Bles di 3 et di Anglia di . . . di oratori nostri, e di Milan. Il sumario de le qual noterò, lete le sarà in Pregadi.

A di 15. La matina in Colegio fo *letere da 284 Corphù di sier Domenego Capelo provedador di l'armada di . . . le ultime*. Come havia ricevuto le nostre, zereha liberar quel Synan Rais etc. *Item*, poi tenisse il tutto suspenso. Scrive altre particolarità *ut in litteris*.

Fono balotati alcuni manchavan di certo Colegio per la lite di quelli bergamaschi over brexani de quelle vallade, e rimaseno alcuni dil corpo di Pregadi et Zonta.

Fo publichà a San Marco et Rialto, da parte di Cai dil Consejo di X, niun homo o femina in questa terra si fazi maschera sotto pena etc. *Item*, non si tegni loci publici a balar la sera come si fa, sotto pena di danari e star in preson.

Da poi disnar fo Consejo di X *semplice* sopra i presonieri, et *tamen* non expediteno alcun.

Et il Colegio di Savii si reduseno a dar audientia.

A di 16 Domenega. La matina non fo letera alcuna da conto. Da poi disnar fo Gran Consejo: fato capitano de le galie di Fian-dra, sier Vicezo di Prioli fo capitano a Baruto qu. sier Lorenzo, qual vene dopio, et tutte le voxe passoe, sichè al presente si passa.

Fu posto, per li Consieri, conceder licentia a sier Marco Balbi, capitano di la citadela di Zara, di poter venir in questa terra per zorni 15, lassando in loco suo un zentilhomo che piaque a la Signoria nostra, con la condition di salario. Fu presà. Sichè si dà licentia *etiam* ai rectori di là di Quarner.

Vene in questi zorni in Colegio uno messo dil ducha Viemo di Baviera, qual presentò una letera a la Signoria, pregando li volesse far comprar per li soi danari falconi, *unde* il Principe si scusò non ne